



Kommunane i Møre og Romsdal

Saksbehandlar, innvalstelefon

Per Eldar Nakken, 71 25 85 81

Rundskriv 2021-1 RMP - Kommentarer til Forskrift om regionale miljøtilskot i jordbruket, Møre og Romsdal

Dette rundskrivet erstatter Rundskriv 2020-2 RMP.

Innhold

Rundskriv 2021-1 RMP - Kommentarer til Forskrift om regionale miljøtilskot i jordbruket, Møre og Romsdal	1
Innleiing	2
Kapittel 1. Innleiande føresegner	2
§ 1. Føremål	2
§ 2. Verkeområde	3
§ 3. Grunnvilkår	3
Kapittel 2. Kulturlandskap	3
§ 4. Drift av bratt areal	3
§ 5. Tilskot til drift av beitelag	3
§ 6. Tilskot til slått av verdifulle jordbrukslandskap	4
Kapittel 3. Biologisk mangfald	5
§ 7. Tilskot til slått av slåttemark	5
§ 8. Tilskot til beiting av kystlynghei	6
§ 9. Tilskot til tilrettelegging av hekke- og beiteområde for fugl	6
Kapittel 4. Kulturminne og kulturmiljø	7
§ 10. Tilskot til drift av seter	7
§ 11. Tilskot til skjøtsel av enkeltståande automatisk freda kulturminne	8
Kapittel 5. Avrenning til vatn og kyst	8



§ 12. Tilskot til ingen jordarbeiding om hausten	8
§ 13. Tilskot til grasdækt kantsone i åker	9
§ 14. Tilskot til vedlikehald av fangdam	9
Kapittel 6. Utslepp til luft	9
§ 15. Tilskot til spreieing av husdyrgjødsel i vår-/vekstsesongen	9
§ 16. Tilskot til nedfelling eller nedlegging av husdyrgjødsel	10
§ 17. Tilskot til bruk av tilførselsslangar	10
Kapittel 7. Miljøavtale og klimarådgjeving	11
§ 18. Tilskot til klimarådgjeving	11
Kapittel 8. Generelle føresegner	11
§ 19. Utmåling og utbetaling av tilskot	11
§ 20. Søknad	11
§ 21. Administrasjon, dispensasjon og klage	12
§ 22. Opplysningsplikt og kontroll	12
§ 23. Avkorting av tilskot	12
§ 24. Tilbakebetaling og renter m.v.	13
§ 25. Iverksetjing	13

Innleiing

Regionale miljøtilskot skal stimulere til ein auka miljøinnsats i jordbruket. Miljøutfordringane er ulike rundt om i landet. Miljøtilskota er derfor utforma for å ivareta dei regionale miljøutfordringane. Kvart fylke har sitt miljøprogram som dekker ei rekke miljøtema: kulturlandskap, biologisk mangfald, kulturminner og kulturmiljø, friluftsliv, avrenning til vatn, utslepp til luft, plantevern, miljøavtale og klimarådgjeving.

2021 er det tredje året i den 4-årige planperioden for regionale miljøtiltak i jordbruket vi er inne i. Forskrifta er bygd over same mønster i alle fylke, jf. nasjonal instruks for regionale miljøtilskot, men kvart fylke kan velje mellom dei tiltak som ligg i det nasjonale miljøprogrammet og prioritere mellom desse. Det er ut frå at miljøutfordringane kan variere frå fylke til fylke.

Kapittelinnndelinga følgjer tilsvarende inndeling i forskriftena. Kapittel 1 inneheld innleiande føresegner, kapittel 2–7 inneheld dei ulike tiltaka og kapittel 8 inneheld generelle føresegner.

Kapittel 1. Innleiande føresegner

§ 1. Føremål

Formålet med denne forskriftena er å bidra til å ta vare på jordbruket sitt kulturlandskap, biologisk mangfald, kulturmiljø og kulturminne, redusere utslepp til luft og avrenning til vatn frå jordbruket samt bidra til andre tiltak som kan redusere klimautslepp.



Det langsigke målet for dette miljøprogrammet er å utarbeide tiltak som medverkar til eit miljøvennleg landbruk, som også har økonomisk berekraft. Samstundes skal landbruket ivareta verdiar som samfunnet ønskjer å prioritere, slik som det opne og velstelte landskapet med kulturminne og biologisk mangfald.

§ 2. Verkeområde

Forskrifta gjeld for tilskot til miljøtiltak i Møre og Romsdal fylke.

Kommentar: Føretak med driftssenter i eit anna fylke, som utfører miljøtiltak i Møre og Romsdal, kan få tilskot til desse tiltaka etter reglane i Møre og Romsdal.

§ 3. Grunnvilkår

Tilskot til miljøtiltak etter denne forskriften kan berre gjevest til

- føretak som har gjennomført tiltak på areal dei disponerer i søknadsåret samt driv vanleg jordbruksproduksjon på ein eller fleire landbrukseigedomar og er registrert i Einingsregisteret, eller
- beitelag, jf. § 5, som er godkjent av kommunen og som er registrert i Einingsregisteret, jf. enhetsregisterloven av 13.06.1994, nr. 15.

Kommentar: Grunnvilkåra svarar til vilkåra for å motta produksjonstilskot. I tillegg kan beitelag godkjende av kommunen søkje om tilskot til drift av beitelag.

Kapittel 2. Kulturlandskap

§ 4. Drift av bratt areal

Tilskot kan gjevest til føretak som driv minimum 5 dekar fulldyrka eller overflatedyrka jord med ei helling på 1:5 eller brattare. Det må takast avling på arealet. Dersom grasproduksjon må arealet haustast ved slått til fôr.

Kommentar: Føretaket må drive minimum 5 daa bratt areal for å kunne søkje om tilskot til skjøtsel av bratt areal. Arealet skal ha ei gjennomsnittleg helling på 1:5 eller brattare. Areal som ligg for seg sjølv, omkransa av areal med andre arealtilstandar enn fulldyrka/overflatedyrka jord, kan takast med i søknaden, dersom det er minst 1 daa.

NB! Areal som vert skjøtta ved berre beiting, gir ikkje rett til tilskot i dette tiltaket.

Arealtala kjem fram etter teikning i kartet i eStil. Arealet må fordelast riktig på kategoriane 1:3 og 1:5, sjølv om det ikkje er forskjell på sats.

§ 5. Tilskot til drift av beitelag

Tilskot kan gjevest til drift av beitelag som organiserer felles beitebruk i utmark i minimum 5 veker i sommarhalvåret.



Kommentar: Føremålet med tiltaket er å legge tilhøva til rette for best mogeleg utnytting av beite i utmark, og å redusere tap av dyr på utmarksbeite gjennom organisert tilsyn, organisert sinking og andre målretta fellestiltak i beiteområde.

Tilskot kan gjevest til beitelag som organiserer felles beitebruk for sau, geit, storfe og hest i utmark i minimum 5 veker i sommarhalvåret. Mjølkande kyr og geiter, og dyr som heile beitesesongen beitar på innmark, er ikkje omfatta.

Det kan søkjast om tilskot til drift av beitelaga gjennom Regionalt miljøprogram, og søkerfristen er **15. november**.

Tilskot kan gjevest med eit fast beløp per storfe/hest og per småfe som blir sleppt på beite.

Godkjenning og krav til beitelag:

Eit beitelag må ha minst 2 medlemar og 150 småfeeiningar. 1 småfeeining = 0,1 storfe = 0,1 hest = 1 sau = 1 lam = 1 geit = 1 kje.

1. Husdyrhaldet som er omfatta av beitelaget si verksemd, må drivast i samsvar med lover og forskrifter som gjeld for husdyrhald
2. Beitelaget må vere registrert i Einingsregisteret.
3. Laget skal vera ope for alle brukarar som har tilgang til utmarksbeite i eit område der samarbeid kan fremje bruken av beiteområda
4. Laget skal bruke alle tilskot til å fremje den organiserte beitebruken i området gjennom felles tiltak.
Tilskotet kan ikkje betalast direkte ut til medlemmane i beitelaget
5. Laget skal organisere effektivt og forsvarleg tilsyn og sinking av dyr i laget sitt område. Det skal gjennomførast tilsyn i beiteområdet minst ein gong per veke, i samsvar med «Forskrift om velferd for småfe»
6. Laget skal samarbeide med tilgrensande lag når det kan effektivisere ressursbruk og utnytting av beita. Dette gjeld særleg sinking og ettersinking
7. Laget skal notere på fastsett skjema opplysningar om gjennomført tilsyn (dato, tilsynsrunde, unormale tilhøve i beiteområdet og tiltak som er sett i verk). Norsk Sau og Geit har utarbeidd skjema og notisbøker for føremålet. Statsforvaltaren og kommunen kan be om å få lagt fram denne dokumentasjonen.
8. Laget skal sende årsrapport på fastsett skjema til kommunen

§ 6. Tilskot til slått av verdifulle jordbrukslandskap

Tilskot kan gjevest til føretak som driv jordbruksareal innanfor nærmere avgrensa soner med særleg verdifullt kulturlandskap.

Kommentar: Det er prioriteringane i dei nasjonale registreringane av verdifulle kulturlandskap og registreringane i Storfjordprosjektet som ligg til grunn for dette tiltaket. Det er ikkje rom for nye område under dette tiltaket.

Områda er avgrensa slik:

1. Sunndal kommune: Grøvvassdraget; alt areal som har avløp til elva Grøvu frå og med Børstølen og oppover.
2. Molde kommune:
 - a. Eikesdalen; alt areal frå og med gardane Vike og Hoem og oppover



- b. Areala på Bugge; frå og med Breivika til og med Bleineset
 - c. Tautra
3. Rauma kommune: Romsdalen; alt areal frå Trollveggen til Oppland grense
 4. Fjord kommune:
 - a. Alt areal i nedslagsfeltet til Dyrkornvassdraget og Stordalsvassdraget ovanfor Vad bru (Nøredalen)
 - b. Alle bygdene på sørsvaen av fjorden frå og med Tafjorden til og med Indreeide
 5. Stranda kommune: Heile Geirangerbygda og alle fjordvendte gardar på begge sider av fjorden frå og med Ljøen til og med Liene, vidare på nordsida av fjorden frå og med Ansok til grensa mot Fjord kommune.
 6. Ørsta kommune: Norangsfjorden og Norangsdalen
 7. Herøy kommune: Runde, Nerlandsøya og Skorpa
 8. Giske kommune: Området ved Alnes fyr
 9. Hustadvika kommune:
 - a. Buaværet og alt areal vest for Nasjonal Turistveg frå Bergset til grensa mot Eide kommune
 - b. Vevangbygda og Årsbogen
 10. Averøy kommune: Øyane langs Atlanterhavsvegen samt eksisterande jordbruksareal i områda nordaust for Atlanterhavsvegen, til og med Storesandøy, Hasseløyseter og området rundt Vågavatnet. Deretter går avgrensinga sørover til Rangøyvegen og følgjer denne til krysset med fylkess veg 64 (Kårvågvegen). Mot sør vert området avgrensa av Kårvågvegen mellom krysset med Rangøyvegen og krysset med Atlanterhavsvegen, vidare av Tøvikvegen (kommuneveg 6072) så langt vest som til og med Grovaneset.
 11. Smøla kommune: Sørsmøla; alle gardane frå og med gnr. 14 Kuløy, til og med gnr. 42 Skarpnes. Tiltaket omfattar ikkje dei nydyrka myrane på Holmsvassmyra, Røkmyra og Jøstølmyra
 12. Ålesund kommune: Heile Ulla, unnateke fjellet. Frå «bruvegen» på Flem og heile nordsida av Flemsøy/ Skuløy til og med nordlegaste garden på Nogva

Det kan gjevast tilskot til areal som ligg innanfor desse sonene, når dei er godkjende for areal- og kulturlandskapstilskot i produksjonstilskot.

NB! Arealet må haustast ved slått. Berre beiting (beiting åleine eller i kombinasjon med beitepussing) kvalifiserer ikkje lenger for dette tilskotet.

Føretak kan få berekna tilskot for arealet som ligg innanfor sonene, uavhengig av kvar driftssenteret er plassert.

Kapittel 3. Biologisk mangfold

§ 7. Tilskot til slått av slåttemark

Tilskot kan gjevast til føretak som skjøtta artsrike slåttemarker som er spesielt verdfulle for biologisk mangfold i kulturlandskapet. Det er ein føresetnad at føretaket følgjer skjøtselsråd gitt av Statsforvaltaren i Møre og Romsdal.

Kommentar: Føremålet er å stimulere til skjøtsel av artsrike slåttemarker, slik at ikkje det biologiske mangfaldet eller andre kvalitetar vert forringa. Det er miljøvernavdelinga som er kontaktpunkt hos



fylkesmannen for desse spørsmåla. Miljøvernavdelinga kan også utarbeide skjøtselsplan for den enkelte slåttemarka.

Vilkår:

1. Areal som skal ha tilskot må ligge i Naturbase eller vere registrert av statsforvaltaren og planlagt innlagt i Naturbase som slåttemark.
2. Arealet må vere i slik hevd, at dei verdiane som ligg til grunn for utveljinga framleis er til stades, eller vil komme attende ved planlagt restaurering.

Skjøtselsråd:

1. Arealet må skjøttast som slåttemark.
2. Arealet må slåast seint, vanlegvis etter 10. juli.
3. Høyet må bakke- eller hesjetørkast.
4. Høyet må fjernast etter tørk.
5. Arealet må slåast med lette reiskap som ljå eller tohjuls slåmaskin.
6. Arealet må ikke bearbeidast i form av pløying, såing, gjødsling eller sprøyting.
7. Arealet kan i tillegg bli haustbeita med lågt beitetrykk.
8. Framande artar kan/bør fjernast.

§ 8. Tilskot til beiting av kystlynghei

Tilskotet kan gjevast til føretak som held ved like område med kystlynghei. Område det blir gitt tilskot til må vere registrert som kystlynghei i Naturbase. Søkjaren må inngå skjøtselsavtale med Statsforvaltaren i Møre og Romsdal, for å sikre at tilstanden på kystlyngheia blir halden ved like. Dyrehald skal vere i tråd med krava i Lov om dyrevelferd av 19. juni 2009 nr 97.

Kommentar: Føremålet er å stimulere til tradisjonell skjøtsel av kystlynghei gjennom sauebeite. Miljøvernavdelinga kan utarbeide ein tilpassa skjøtselsplan.

Det skal leggast vekt på dyrevelferd. I tiltaket er det eit krav på minst 10 daa beiteareal per vaksen sau. Det skal førstast tilsyn med dyra minst ein gong i veka, i samsvar med «Forskrift om velferd for småfe». Dersom kvaliteten på beitet er slik at 10 daa beiteareal per vaksen sau ikkje er nok til at dyra har tilfredsstillande førtilgang, må dyretalet reduserast. Beitetrykket bør vere stort nok til å oppretthalde kvaliteten på kystlyngheia. Tilskotet vert automatisk avgrensa til maksimalt 50.000 kroner per føretak.

§ 9. Tilskot til tilrettelegging av hekke- og beiteområde for fugl

Det kan gjevast tilskot til tilrettelegging av hekkeplassar for utsynningstruga fugleartar, dersom det er inngått avtale med Statsforvaltaren i Møre og Romsdal for vedkommande sesong.

Kommentar: Føremålet er å verne dei fugleartane som over lang tid har tilpassa seg hekking på kulturmark. Effektivt jordbruk, særleg tidlegare hausting, kan slå ut heile bestandar av fugleartar som tradisjonelt hekkar i slåttemark. Både egg, ungar og vaksne fuglar blir øydelagde i grashaustinga, fordi haustinga no skjer før eggja er klekte eller ungane har forlate reirområdet. I tillegg vert areal ofte hausta frå kanten og inn mot midten, noko som avskjer rømingsvegane for fuglane. Dersom arealet vert hausta, bør det skje slik at fuglane kan kome unna.



Føretak kan få tilskot til å setje av areal, der det er registrert at utrydningstruga fugleartar hekkar, slik at dette arealet ikkje blir slått før ungane har forlate området. Tidlegaste slåttedato for slikt areal er sett til 1. august.

Åkerriksa er den mest kjende utrydningstrua fuglearten som hekkar på innmark i vårt område, men storspove, vipe og grashoppesongar er også trua, og kan kvalifisere for tilskot. Det er Miljøvernnavdelinga hos Statsforvaltaren i Møre og Romsdal som inngår avtale, avgjer kva fugleartar som kvalifiserer for vern, og kor mykje areal som må setjast av for at hekkeplassen skal ha tilstrekkeleg vern. Arealet må kartfestast i avtale mellom bonden og Statsforvaltaren i Møre og Romsdal.

Kapittel 4. Kulturminne og kulturmiljø

§ 10. Tilskot til drift av seter

Tilskot kan gjevast til føretak som har heile eller deler av mjølkeproduksjonen på seter i minst 6 veker i sommarhalvåret. Det må produserast minst 45 liter kumjølk eller 25 liter geitmjølk dagleg i setningsperioden. Produksjonen må skje innanfor kvote, eller i samsvar med forskrift om fritak frå overproduksjonsavgift ved lokal foredling av mjølk.

Kommentar: Føremålet er å bidra til å oppretthalde og stimulere til auka bruk av setrane i fylket. Dette for å ta vare på, vidareføre og vise fram setermiljøet og halde ved like det biologiske mangfaldet, som er knytt til denne driftsforma. Føremålet vil gjelde både dei sidene av seterkulturen som er knytt til bygningar, foredling av mjølka og til stell av landskapet ved beiting og slått.

Dyra skal mjølkast på setra.

Godkjenning av nye setrar må sjåast i samanheng med det som finst av tradisjonell seterkultur på staden og om det har vore seter ein gong. Jord som tidlegare har vore brukt til vanleg jordbruksdrift med busettnad heile året, skal i regelen ikkje godkjennast. Det er med andre ord ein føresetnad at seterområdet er eit tillegg til den daglege gardsdrifta, i eit område der det ikkje er naturleg å bu heile året.

Drift av enkeltseter med mjølkeproduksjon

Føretak som har kyr eller geiter fordelt på to eller fleire setrar, kan berre få eitt setertilskot. Derimot kan føretak som har kyr på ei seter og geit på ei anna, få tilskot for to setrar.

Drift av fellesseter med mjølkeproduksjon

Der fleire samarbeider om setringa, skal tilskotet fordelast på tal deltarar i fellessetra. Deltaking er uavhengig av om føretaket har skote inn eigarkapital i setra eller ei. Det avgjerande spørsmålet er kor mange som har hatt mjølkeproduksjon på setra i minst 6 veker i sommarhalvåret.

På ei seter kan det vere fleire seterhus, der ulike føretak driv seter. For at seterdrifta til eit føretak skal definerast som eiga seter og ikkje fellesseter, skal det ikkje vere nemnande samarbeid med andre føretak om drifta. Kvart føretak skal til dømes ha kvart sitt husdyrrrom til mjølking, med eige mjølkeanlegg og tank.

Alle deltarar i fellessetra fyller ut sitt eige søknadsskjema, og fører opp tal deltarar på kvart sitt skjema. Ved søknad om tilskot til fellesseter, skriv alle søkerane inn same tal deltarar på setra.

Kommunen må sjå til at alle på den same fellessetra fører opp/får godkjent like mange deltarar, elles vert tilskotet feil utmålt, og det kan bli betalt ut både for lite og for mykje tilskot.



Drift av enkeltseter med foredling

Føretak som driv seter, kan også få tilskot til foredling av mjølk. På seter der føretaket får tilskot til foredling, bør det vere mogeleg å få kjøpe lokalt foredra mjølkeprodukt. Å vise fram seterkulturen ved demonstrasjon av tradisjonelle driftsformer som kinning, separering, ysting, ljåslått, hesjing osv. vil vere svært positivt. På denne måten kan besøkande få oppleve seterkulturen både ved smak og ved å delta aktivitetar.

Vilkår for tilskot for foredling

1. Det skal bu folk på setra i minst 6 veker om sommaren.
2. Mjølka skal vidareforelast på setra.
3. På setra skal det vere hus for opphold og overnatting, fjøs og rom for handtering av mjølka.
4. Drifta skal ha godkjenning av Mattilsynet.

Drift av fellesseter med foredling

Alle deltagarane i fellessetra fyller ut sitt eige søknadsskjema, og fører opp tal deltagarar på kvart sitt skjema. Det er berre dei som deltek i foredlinga som skal føre opp dette tiltaket. Det kan vere eit mindre tal enn tal deltagarar i fellesseter.

§ 11. Tilskot til skjøtsel av enkeltståande automatisk freda kulturminne

Tilskot kan gjevast til føretak som skjøttar automatisk freda gravminne på areal som grenser til eller ligg på jordbruksareal. Med «grenser til» meinast at kulturminnet ligg slik til at det er ein naturleg del av jordbrukslandskapet som blir skjøtta. Gravminnet skal vere lagt inn i kulturminnebasen Askeladden. Gravminnet skal ikkje vere sterkt skada eller øydelagt.

Kommentar: Aktuelle register for kulturminne:

- Riksantikvaren sin database «Askeladden»
- Økonomisk kartverk
- Møre og Romsdal fylkeskommune sitt arkeologiske arkiv

Gravminnet skal skjøttast på ein måte som gjer det synleg og tilgjengeleg. Aktuelle skjøtselstiltak er manuell slått eller beiting. Det skal ikkje brukast maskiner som kan skade kulturminnet. Dersom gravminnet er forringa på grunn av attgroing, skal det ikkje godkjennast for tilskot. Det kan gjevast tilskot til inntil 20 gravminne per føretak.

Kapittel 5. Avrenning til vatn og kyst

§ 12. Tilskot til ingen jordarbeidning om hausten

Tilskot kan gjevast til føretak som utset jordarbeidning av kornareal til våren. Tilskot kan gjevast til område ved særleg utsette vassdrag, når dette er fastsett i tråd med vassforskrifta¹. I vårt fylke er ordninga avgrensa til å gjelde areal der det blir dyrka korn i nedslagsfeltet til elvane Surna, Driva og Rauma. Desse elvane ligg i kommunane Surnadal, Sunndal og Rauma. Aktuelle område er kartfesta, og areal som det blir søkt tilskot for må teiknast inn i kart i eStil.

¹ Forskrift 15. 12.2006 nr 1446 Forskrift om rammer for vannforvaltningen



Kommentar: Føremålet er å unngå jordarbeiding om hausten, for å redusere erosjon og avrenning av næringsstoff frå opent åkerareal. Tiltaket skal også støtte opp under arbeidet med vassforskrifta.

§ 13. Tilskot til grasdekt kantsone i åker

Tilskot kan gjevest til føretak som har kantsoner med fleirårig grasdekke mellom åkerareal og vassdrag. Formålet er å hindre/redusere erosjon og avrenning frå åkeren og rett i vassdraget. Sona det blir gitt tilskot for, skal ha ei breidd må minimum 8 meter målt frå normalvasstanden i vassdraget. Minst 6 meter må ligge på dyrka areal. **NB! Ei kantsone skal vere ei kantsone og ikkje ein teig med grasproduksjon som ligg mellom eit åkerareal og ei elv. Det er òg eit vilkår at kantsona ligg ned mot ei elv og ikkje mot skog eller anna vegetasjon.** Ordninga gjeld areal der det blir dyrka korn, poteter og grønsaker i nedslagsfeltet til elvane Surna, Driva og Rauma samt i Smøla kommune.

Det er vilkår om at vekstane er godt etablerte om hausten i søknadsåret. Areala skal ikkje gjødsla eller sprøytaast, og dei skal slåast, beitast eller pussast i søknadsåret. Mange føretak som er aktuelle for denne ordninga har ikkje utstyr for å hauste gras eller beitedyr, derfor blir det tillatt at areala kan pussast. Merk at pussing ikkje oppfyller krav til aktiv drift når det gjeld areal- og kulturlandskapstilskot.

§ 14. Tilskot til vedlikehald av fangdam

Tilskot kan gjevest til føretak som har fangdam som er etablert på eller i tilknytning til jordbruksareal. Formålet med tilskotet er å stimulere til at fangdammar utgjer eit effektivt rensetiltak og at vegetasjon i tilknytning til fangdammane blir skjøtta.

Tilskotet kan bli gitt årleg forutsatt at fangdammen har tilfredsstillande renseeffekt. Effekten går ned etter kvart som sedimentasjonskammera blir fylt opp. Dammen skal derfor tømmast ved behov. Godkjent areal er sjølve dammen (vannspeilet) med tersklar og tilhøyrande kantar.

Kapittel 6. Utslepp til luft

§ 15. Tilskot til spreiling av husdyrgjødsel i vår-/vekstsesongen

Tilskot kan gjevest til føretak som spreier all husdyrgjødsela som føretaket brukar på sitt jordbruksareal om våren eller i vekstsesongen. Formålet er å stimulere til at husdyrgjødsel og biorest blir spreidd på eit mest mulig gunstig tidspunkt for plantevokst. Siste frist for all spreiling av husdyrgjødsel på føretaket er 10. august, og avlinga må haustast ved slått eller beiting etter siste spreiling.

Det må vere spreidd ei gjødselmengde tilsvarende minimum 5 kg totalnitrogen pr. daa, i tråd med gjødslingsplan. Kor stor gjødselmengde 5 kg total-N tilsvarer i volum vil variere både med dyreslag og kor mykje vatn som er tilsett. Ei veldig grov rettesnor er at dette tilsvarer ca. 1 tonn blautgjødsel pr. daa. Noko meir dersom det er tilsett mykje vatn. For sau kan ein rekne 1 kg N pr. dyr pr. månad.

Føretaket skal ha skiftenoteringar som viser spreiedato(ar) og spreiemengde for kvart skifte.

Det kan ikkje bli gitt tilskot dersom deler av gjødselmengda frå føretaket blir spreidd på areal disponert av andre jordbruksføretak etter fristen 10. august. Det kan berre gjevest tilskot for areal som føretaket sjølv disponerer. Det er ikkje krav om eige husdyrhald. Dette betyr at t.d. deltakar i samdrift som sjølv står for førproduksjon kan söke om tilskot for tidlegsspreiling av husdyrgjødsel produsert av samdrifta. Ein



kornprodusent kan også kjøpe husdyrgjødsel og søke om tilskot for tidlegspreiing forutsatt at vilkåra elles er oppfylt.

Oppsummering av vilkåra for dette tiltaket:

- **Spreiing av all husdyrgjødsel på eller frå føretaket innan 10. august**
- **Arealet må haustast ved slått eller beiting etter siste spreiing**
- **Minimum gjødselmengde tilsvarende 5 kg total-N pr. daa**
- **Føretaket må disponere arealet det blir søkt på**

Føretak som mottek dette tilskotet kan ikke samtidig motta tilskot for nedlegging eller nedfelling av husdyrgjødsel.

§ 16. Tilskot til nedfelling eller nedlegging av husdyrgjødsel

Tilskot kan gjevest til føretak som brukar nedfellings- eller nedleggingsutstyr for spreiing av husdyrgjødsel. Formålet med tilskotet er å stimulere til at husdyrgjødsel og biorest blir lagt rett ned på jorda (nedlegging) eller blanda direkte i jordsmonnet (nedfelling) i staden for tradisjonell breispreeiing. Dette vil motverke tap av ammoniakk til lufta.

Det er krav om same minimumsmengde husdyrgjødsel som for tidlegspreiing, dvs. minst 5 kg total-N pr. daa. Arealet skal haustast ved slått eller beiting etter siste spreiing. Ved spreiing i open åker er det krav om nedmolding innan to timer. Føretaket skal ha skiftenoteringar som viser spreiedato(ar) og spreiemengde for kvart skifte.

Føretak som mottek dette tilskotet kan ikke samtidig motta tilskot for tidlegspreiing (§ 15).

§ 17. Tilskot til bruk av tilførselsslangar

Dersom vilkåra i § 15 eller § 16 er oppfylt, kan det gjevest tilskot til føretak som spreier husdyrgjødsel ved hjelp av tilførselsslangar. Tilskotet kan gjevest til areal der det vert spreidd husdyrgjødsel ved hjelp av tilførselsslangar i staden for tankvogn.

Formålet er å redusere utslepp til vassdrag og luft gjennom spreiemetode som medfører redusert jord-pakking. Utslepp av lystgass, som er ein sterk klimagass, er størst i fuktig, tett jord med høgt innhold av nitrogen. Kombinasjonen av bærersvak jord, bruk av tungt utstyr, fuktig klima og store mengder husdyrgjødsel gjer at potensialet for utslepp av lystgass er stort i mange område. Bruk av tilførselsslangar for å transportere husdyrgjødsela ut på marka bidreg til å redusere køyreskader og jordpakking, og vil såleis vere eit tiltak som kan bidra til å redusere utsleppa av lystgass frå landbruket.

Det kan gjevest tilskot til alt areal der det er brukt tilførselsslangar i staden for tankvogn for å transportere husdyrgjødsla ut på marka. Mengda må tilsvare minst 5 kg total-N pr. daa. Tiltaket føreset at vilkåra etter § 15 eller § 16 er oppfylt, dvs. at all husdyrgjødsela frå føretaket vert spreidd tidleg i vekstsesongen, seinast 10. august, eller at det er brukt nedfellings- eller nedleggingsutstyr. Det er også eit vilkår at avlinga blir hausta ved slått eller beiting etter siste spreiing.



Kapittel 7. Miljøavtale og klimarådgjeving

§ 18. Tilskot til klimarådgjeving

Det kan gjevast tilskot til føretak som har gjennomført klimarådgjeving i perioden frå 15. oktober i året før søknadsåret til 15. oktober i søknadsåret. Formålet er ein heilsakleg gjennomgang av utslepp og opptak av klimagassar på garden med sikte på kunnskapsoppbygging hos bonden og å gjennomføre klimatiltak.

Tiltaksplan og kvittering for utført rådgjeving må leggast ved søknaden. Den som har stått for rådgjevinga må vere godkjent som klimarådgjevar av Landbruksdirektoratet. På heimesida til Landbruksdirektoratet, under ordninga «Regionalt miljøtilskudd i jordbruket (RMP)», er det lagt ut fylkesvis oversikt over alle som er godkjente som klimarådgjevarar. Tiltaksplanen må vere i tråd med dei krav som Landbruksdirektoratet stiller til tiltaksplaner for denne ordninga.

Det kan søkast om tilskot for klimarådgjeving fleire gonger. Dersom det blir søkt om tilskot i fleire søknadsomgangar, er det eit vilkår at det er utarbeidd ein ny og oppdatert tiltaksplan.

Aktuelle tiltaksklasser:

- Ein-til-ein-rådgjeving med høg sats. Tiltaksplan som omfatter både husdyrproduksjon og planteproduksjon.
- Ein-til-ein-rådgjeving med lav sats. Tiltaksplan som omfatter enten husdyrproduksjon eller planteproduksjon.
- Grupperådgjeving. Tiltaksplan som er utarbeidd med bakgrunn i rådgjeving retta mot to eller fleire føretak samla.

Vurderinga må skje for det enkelte føretak. Eit føretak som har husdyr og tilhøyrande grovförproduksjon kjem i gruppa med høg sats. Dersom føretaket berre har grovförproduksjon for sal (t.d. til ei samdrift) og/eller anna planteproduksjon kjem i gruppa med låg sats. Låg sats er det også dersom føretaket berre har husdyrproduksjon på eitt eller fleire dyreslag.

Det kan gjevast tilskot for berre éi gjennomført rådgjeving per søknadsomgang.

Kapittel 8. Generelle føresegner

§ 19. Utmåling og utbetaling av tilskot

Tilskot blir rekna ut etter satsar som blir fastsett årleg på grunnlag av tilgjengeleg ramme og ferdigbehandla og godkjent søknadsmasse.

Kommentar: Alle satsar i miljøprogrammet er førebelse. Endelege satsar vil bli fastsette innan 4. februar 2022. Det skjer på grunnlag av den økonomiske ramma og søknadsomfanget. I tidsrommet mellom 5. og 18. februar må kommunen gjere endelege vedtak for (attestere) søknadene som skal gå til utbetaling.

§ 20. Søknad

Søknad skal fremjast på søknadsskjema fastsett av Landbruksdirektoratet. Søknadsfristen er 15. oktober. For tilskot til beitelag er søknadsfristen 15. november.



Dersom søknaden blir motteken etter fristen, vil det tildelte tilskotet bli redusert med 1 000 kroner per dag, rekna frå utgått frist og i inntil 14 dagar. Søknader som kjem inn seinare enn 14 dagar etter fristen, vil bli avvist. Innvilga tilskot blir utbetalt til det føretaket eller beitelaget som fremja søknaden. Tilskotet kan ikkje overdragast til eige eller pant.

§ 21. Administrasjon, dispensasjon og klage

Vedtak om tilskot blir fatta av kommunen. Statsforvaltaren kan etter søknad i særlege tilfelle gje dispensasjon frå føresegne i denne forskrifta.

Vedtak fatta av kommunen kan klagast² til Statsforvaltaren. Vedtak fatta av Statsforvaltaren i første instans kan klagast til Landbruksdirektoratet.

Kommentar: Det kan berre gjevest dispensasjon frå krav i forskrifta. Det betyr at det ikkje kan gjevest dispensasjon frå tilskotssatsar, soner eller registreringsdato.

Det blir vist til Rundskriv 2021-13 frå Landbruksdirektoratet, § 47 som omhandler dispensasjon.

§ 22. Opplysningsplikt og kontroll

Føretak som søker tilskot, pliktar å gje alle opplysningar som kommunen, Statsforvaltaren og Landbruksdirektoratet finn nødvendig for å kunne forvalte ordninga.

Kommunen, Statsforvaltaren og Landbruksdirektoratet kontrollerer at utbetaling av tilskot er riktig. Søkjaren pliktar å utlevere all bokføring, korrespondanse og noteringar som vedkjem tilskotet. Opplysningar gitt i samband med søknad om tilskot kan også kontrollerast ved teljing og måling på dei eigedomar som føretaket nyttar i drifta.

Det blir vist til Rundskriv 2021-13 frå Landbruksdirektoratet, § 48.

§ 23. Avkorting av tilskot

Dersom føretaket aktlaust eller forsettleg driv eller har drive verksemda si i strid med anna regelverk for jordbruksverksemd, kan heile eller deler av det samla tilskotet til føretaket bli avkorta. Det same gjeld dersom føretaket har gitt feil opplysningar i søknaden slik at søker eller andre har fått eller kunne fått feilaktig utbetalt tilskot.

Tilskotet kan også bli avkorta dersom føretaket

- Ikkje held dei fristar som kommune, Statsforvaltar eller Landbruksdirektorat har sett for å kunne oppfylle sine kontrolloppgåver etter § 22,
- Ikkje har gyldig gjødslingsplan, jf. Forskrift om gjødslingsplanlegging,
- Ikkje har ført plantevernjournal.

Det blir vist til Rundskriv 2021-13 frå Landbruksdirektoratet, § 49.

Det er naturleg å bruke dei same normer for avkortingsnivå i denne ordninga som for produksjonstilskot, jf. Forskrift om produksjonstilskudd og avløsertilskudd i jordbruket med tilhøyrande rundskriv.

² Jf. lov av 10. februar 1967 om behandlingsmåten i forvaltingssaker (forvalningsloven) kap. VI.



§ 24. Tilbakebetaling og renter m.v.

Dersom føretaket som følgje av manglende oppfylling av vilkår i denne forskriften eller av andre grunner har motteke ei utbetaling som ikke er berettiga, kan det feilaktig utbetalte beløpet krevjast tilbakebetalt frå mottakaren eller motrekna i seinare tilskotsutbetalinger. Tilsvarande gjeld differansen mellom utbetalte beløp og redusert tilskot som følgje av vedtak om avkorting etter § 23.

Det kan krevjast renter for tilbakebetalingskrav, dersom kravet ikke blir innfridd ved forfall. Ved grov aktløyse eller forsett kan renter krevjast frå tidspunktet for utbetinga av det urettmessige tilskotet. Storleiken på renta følgjer rentesatsen fastsett med heimel i lov 17. desember 1976 nr. 100 om renter ved forsinka betaling m.m.

Krav frå offentleg myndighet som har utgangspunkt i føretaket si jordbruksverksemde, kan motrekna i seinare tilskotsutbetalinger til føretaket.

Det blir vist til Rundskriv 2021-13 frå Landbruksdirektoratet, § 50.

§ 25. Iverksetjing

Forskrifta vart sett i verk 6. juli 2021, og erstatta forskrift 19. mai 2019 nr 641.

Spørsmål om Regionalt miljøprogram for Møre og Romsdal kan rettast til kommunen eller Statsforvaltaren i Møre og Romsdal.

Med helsing

Marianne Aas Halse (e.f.)
fagleiar

Per Eldar Nakken
seniorrådgivar

Dokumentet er elektronisk godkjent